



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Oekusi
04 Marsu 2019

Tribunál Distritál Oekusi primeiravés aplika suspensaun ba pena prizaun ho devér husu deskulpa iha públiku iha krime maus tratus ba kónjuje

Iha 25 Feveireiru 2019, Tribunál Distritál Oekusi kondena arguidu ho pena prizaun tinan 3 maibé suspende ba tinan 4 tanba provadu arguidu komete krime maus tratus hasoru nia feen. Tribunál mós haruka kondenu husu deskulpa ba lezada iha autóridade lokál sira nia oin ne'ebé envolve membru família hosi parte rua iha tempu fulan rua nia laran. Depoisde halo tiha ida-ne'e tenke lori akta rezultadu husu deskulpa ne'e ba apresenta iha tribunál.

“Ida-ne'e nu'udar mudansa pozitivu ida iha Tribunál Distritál Oekusi mesmu ho andamentu ne'ebé kleur tanba primeiravés tribunál introdús pena prizaun nia suspensaun ho devér liuhosi haruka arguidu husu deskulpa ba lezada iha membru familia sira ninia oin iha kazu violénsia bazeia ba jéneru,” dehan Diretor Ezeutivo JSMP, Luis de Oliveira Sampaio.

Antes ne'e, iha 22 Janeiru 2018, JSMP mós rejista Tribunál Distritál Oekusi aplika ona regra ba konduta ba kazu ofensa ba integridade fizika simples ho natureza violénsia doméstika ne'ebé kondena ho pena prizaun tinan 2 suspende ba tinan 2 no selu kustu judisiál US\$ 30. Tribunál mós aplika regra ba konduta atu arguidu apresenta-an periodikamente iha Tribunál fulan ida dala ida, iha loran primeiru iha kada semana primeiru, durante períodu suspensaun nia laran.

Provizaun kona-ba dever adisionál husu deskulpa ba ofendidu iha públiku regula iha Artigu 69 alineaia 2 (b) Kódigu Penál (KP) kona-ba prizaun nia suspensaun ho devér ne'ebé define katak kondenu apresenta deskulpa ba ofendidu iha públiku.

JSMP konsidera aplikasaun regra dever adisionál liuhosi husu deskulpa ba lezada iha públiku, ne'e nu'udar forma ida atu kurize kondenu ninia hahalok no eduka arguidu la repete tán ninia hahalok iha futuru. Aleinde ne'e bele sai mós nu'udar referénsia no lisaun ba família sira seluk atu aprende katak violénsia doméstika nu'udar krime no la iha toleransia iha sociedade. Mezmu kondenu no lezada la moris hamutuk ona hanesan família, maibé aplikasaun dever adisionál hamutuk ho suspensaun nu'udar pasu importante atu hametin aplikasaun lei penál sira iha prátika.

JSMP rekomenda ba tribunál sira atu kontinua utiliza regra adisionál sira iha pena suspensa ba kazu violénsia bazeia ba jéneru sira iha futuru atu hanorin arguidu sira hadok-an hosi violénsia no promove família ne'ebé moris laho violénsia no respeita malu.

Rua setubal, Colmera, Dili Timor Leste

PoBox: 275

Telefone: 3323883

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

Iha kazu ne'e, prokurador akuza katak iha 23 Jullu 2017, arguidu tebe dala ida iha lezada nia tilun-hun parte loos halo lezada monu ba rai no desmaia.

Antes ida-ne'e, iha Juñu 2017, arguidu tebe dala ida iha lezada nia kelen karuk halo lezada monu ba rai no rakut lezada nia fuuk hodi dada lezada tama ba uma laran. Arguidu mos ameasa lezada katak loron ida lezada sei mate. Aleinde ne'e, iha Abril 2017, arguidu tebe dala ida iha lezada nia ulun. Kazu ne'e anexa ho fotografia hosi polisia. Prokurador mos akuza katak antes agresaun hirak ne'e akontese, arguidu no lezada sempre diskute malu uluk no arguidu hakarak duni sai lezada hosi uma maibe lezada lakohi atu sai hosi uma.

Prokurador akuza arguidu kontra artigu 154 KP kona-ba maus tratus ba konjuje ho moldura penál tinan 2 to'o tinan 6 prizaun.

Iha produsaun ba prova, arguidu nega faktu sira hotu maibe lezada kontinua reforsa faktu sira iha akuzasaun no deklarata katak aleinde halo violensia hasoru lezada, arguidu sempre lori fetu seluk ba iha sira nia uma.

Iha alegasaun final, prokurador mantein nia akuzasaun no husu ba tribunál atu kondena arguidu bazeia ba krime ne'e nia gravidade. Entretantu defeza husu tribunál atu absolve arguidu hosi akuzasaun prokurador nian tanba arguidu deklarata katak nia la komete krime hirak ne'e. Maibe kuandu tribunál iha hanoin seluk, defeza husu atu tribunál fó justisa tuir arguidu nia sala.

Depoide avalia faktu sira hotu, tribunál konklui katak arguidu provadu komete duni krime tuir faktu sira iha akuzasaun. Tribunál konsidera arguidu komete aktu hirak ne'e ho intensaun atu fahe malu ho lezada. Tanba ne'e agora daudaun arguidu no lezada fahe malu ona.

Bazeia ba faktu hirak-ne'e hotu, tribunál kondena arguidu ho pena prizaun tinan tolu suspende ba tinan haat. Tribunál mos aplika devér adisional atu arguidu husu deskulpa ba lezada iha autoridade lokal nia oin no envolve membru familia rua nia oin iha tempu fulan rua nia laran no lori akta rezultadu husu deskulpa ne'e ba iha tribunál.

Tribunál subliña katak embora kondenadu ho lezada moris fahe malu ona, maibe kondenadu iha obrigasaun atu husu deskulpa ba lezada ba hahalok aat sira ne'ebé durante ne'e kondenadu halo ba lezada atu eduka arguidu no sociedade iha jerál atu la repete tan hahalok hanesan ba ema seluk.

Kazu ne'e rejista iha tribunál ho Nú. Prosesu : 0016/17.OEPSB. Julgamentu kolektivu ne'e prezide husi juis, Dr. João Ribeiro, Dra. Sribuana da Costa, Dr. Eusébio Victor Xavier no akompaña hosi Dra. Alexandre E. Brige Viega nu'udar Juisa mentora. Prokurador representa hosi Dr. Mateus Nesi no arguidu hetan defeza hosi Dr. Calisto Tout hosi Eskritóriu Defensória Públiku.

Atu hetan informasaun liutan bele kontaktu ba:

Luis de Oliveira Sampaio

Diretor Ezekutivu JSMP

E-mail: luis@jsmp.tl